

ROZÊ RINDEKÎ

Bülent Boral

babek

1

Bülent Boral, 1972 de Çewlîg (Bîngöl) de dewa Xorxolî Hêrdîf de ame dîna. Domonênîya ho dewe de vêrde ra. Mektevo virên dewe de wend. 1985 de eve çê ho barkerd şî Estemol. Mektevo wertên u mektevê lise Estemol de wend. Serra 1995 ra dima Estemol de komelê KAYY-DER de gurênayîsê tîyatroyî de ca guret. Grubê tîyatroyî de nejdîyê 10 kayê kirdaşkî u di kî kayê kirmanckî de kay kerd. 2006 de kitavê huyê şîrunê Tirkî 'Surginde Mendî Mezelê Ho' hetê çapxanê Pêrî ra vejîya. 2008 ra dima Kollektîfê Sînemayê Mezopotamya de gurênayîsê ho devam kerd. Na kolektîf de xêlê filmu de gurêya. 2011 de Sairê Dersîmî Silêmanê Qijî sero ju belgefilm ont. Belgefilmo de bîn kî 'Mordemo ke Kemerude Qeseyî Keno' serra 2022 de suka Van î de ont. Nika hetê belgefilm sero gurênayîsê ho devam keno.

BABEK YAYINLARI: 85

Şiir

ROZÊ RİNDEKÎ

Bülent Boral

Kapak ve Sayfa Düzeni | Aristan

Birinci Baskı | Kasım 2023

ISBN: 978-605-72555-7-0

İç/Kapak Baskı-Cilt | Berdan Matbaacılık

Davutpaşa Caddesi, Güven Sanayi Sitesi, C Blok, No: 215-216

Topkapı - İstanbul

Sertifika No: 45750

© BABEK YAYINLARI

(VENTUS BASIM YAY. DAĞ. ORG. SAN. TİC. LTD. ŞTİ.)

Hobyar Mah., Cemal Nadir Sokak, Ferah Han, No: 16, Daire: 21

Cağaloğlu-Fatih / İstanbul

Tel: 0 (532) 160 79 98

E-mail: babekyayin@gmail.com

Sertifika No: 48039

ROZÊ RİNDEKİ

Bülent Boral

 babek

Serva zone mao ke şindorê vinbiyayenedero...

TEDEYÎ

BÊ ŞÎME	7
VÊSAYE	9
ROZÊ RINDEKÎ	10
WELAT	13
EZ U AP SILÊMANÊ QIJÎ	19
WEXTO VIRÊN DE MARÊ DEWE	28
ÊNDÎ BÊ	30
SURGINDE MENDÎ MEZELÊ HO	31
TI AMA	35
VÎRAKerdîs	39
MAYÊ SEMÎ	41
VAZE HELA	44
A HÊNE DE	46
TI YÊNA RA MI VÎRÎ	54
NEWROZ	56
RENGO KEWE	58
HETÊRA	60
TI NÊNA	61
ZELZELE	63

BÊ ŞÎME

Bê

Şîme tarîyê na pesewe ra

Kam vano vinetene rinda

Hona ke hurêndîya ma bêlî nêbîya

Hona ke silîye nêvora

Şîme

Hetê ra şîme

Hetê ra jêde vîme

Bê

Pesewa

Adiro de girs wekerîme

Dorme de biçerexîme

Bê

Raya ma sero meterişî estê

Gere rind şîme

Hetê ra şîme

Hetê ra jêde vîme

Bê

Make şîme

Kilamê ma pêt vajînê

Govenda ma bena derge

Ŷao honik vengê ma keno xorî

Mîlçik u têtîrî ma sero fir danê

Bê

Guna ho na suka pîle de caverdîme

Hênî şîme

Hetê ra şîme

Hetê ra jêdevîme

VÊSAYE

Mi daro vêsaye dî

Birro vêsaye dî

Vaso vêsaye dî

Dewa vêsayîye hona newe vênenu

ROZÊ RINDEKÎ

Ma henî zona ke
Ê rozê rindekî rew yê nê hetê ma ser de
Pukeleke rew darîna we ma ser ra
Vore rew urzena ra rîyê hardî ra
Tîjî rew bena şîrêne
Dîna rew bena esqilî
Xojîvê sarî rew yêno hurendî

Ma henî zona ke
Ê rozê rindekî rew yê nê hetê ma ser de
Xoza rêw bena hewze dormê ma de
Was koka ho ser ro rew rojeno
Dar u ber rew jîl dano
Perperik î rew fir danê nat u dot de
Goze rew bena kakile dara ho de
Meş î pêtaga ho ra rew vejînê
Rew fetelînê gul u çiçegu ser ra

Ma henî zona ke
Ê rozê rindekî rew yê nê hetê ma ser de
Pêrodayîs rew qedîno welatê ma de
Haştîye rew yê na
Merdena xortu rew vindena
Gonîya keşî nê rêzena wela hardî de
Bervayîsê mau
Heştîrê wau rew qedîno

Ma henî zona ke
Ê rozê rindekî rew yê nê hetê ma ser de
Ma rew urzeme ra na hewno xurî ra
Wela merdena ke esta ra ma ser
Rew erzeme ho ser ra
Welatê horê rew wayîr vejîme
Zonê horê
Kamîya horê
Kamilunê horê wayîr vejîme
Sevekneme kirmancîya ho pêro pîya

Ma henî zona ke
Ne welatê ma de
Ne kî serê dîna de
Kes nêmaneno vêsan u têsan
Kes bêkes
Kes bê ware
Kes mirozin
Kes vileçet nêmaneno

Ma henî zona ke
Ê rozê rindekî rew yê nê na hetê ma ser de
Hema ê rozê rindekî nîyameyî hona na het de
Huyayîsê ma nêmezê mend
Sarê ma bê omed
Welatê ma murozin mend

Wazeme ke ê rozê rindekî
Bêrê endî na het de
Wazeme ke rew berê
Ravêr bêrê

Hema henî oseno ke
Ê rozê rindekî
Hona xêlê wext nê nê na het ser de

WELAT

Usar ke ame welat
Hewz yêno rîyê dîna
Esq yêno
Çêf yêno
Vore sona silîye yêna

Usar ke ame welat
Wele urzena ra hewno xorî ra
Roze vêrena ra sewa derge ra
Vao honik beno ra
Çêver beno ra
Sosin beno ra
Most yêno ra
Kuno meske
Meske de sanîno ra

Usar ke ame welat
Vas kuno mergu
Uwe kuna deru
Sit kuno cicikê mangu

Roz beno berz
Hêlî beno berz
Adir beno we
Düyê adirî beno berz

Tirsike vêjîna wertê vasu de
Riwêş wêjînê wertê kasu de
Sunc î vêjînê wertê puşî de
Morsing vêjîno wertê kemeru de

Mem sono malî
Hem sono gawu
Pî sono hêga
Maye sona gore
Qijî tenêna benê pîl
Pîlî tenêna benê kokim

Anman ke ame welat
Vora koyî bena senik
Uwa deru bena tenik
Zerê dewe beno germ
Ware kowu beno honik

Çeyî sonê ware
Ware beno şên
Bê veng mamena dewe
Dêştî
Sodir sonê dewe
Sondir yê nê ware

Vas çînîno dewe de
Wenca çînîna
Hewz beno zerd
Payîze beno derg

Payîz ke ame welat
Vasê kou vêseno
Hewzê kou sono
Kaşî sur kenê
Hêgayî zerd kenê

Payîz ke ame welat
Bar kenê çeyî pêyser yê nê
Bena şên têtîya dewe
Roşt kena o wext sewe
Teynîya manenê warêyî
Benê page hata sera bîne

Payîz ke ame welat
Payze çînîno
Con çarnîno
Simer vêjîno
Genim vêjîno
Simer sono mereke
Genim sono areye

Payîz ke ame welat
Perikê birrî beno zerd
Vas beno zerd
Hardo dewrês beno zerd
Wexte zimistanî yêno
No miletî rê beno derd

Zimistan ke ame welat
Vore vorena hurdî hurdî
Koy sîs kenê pira pira
Va beno ra hênî xaftilêna
Tozika vore keno ra ho ver
Vaydano na het u o het ra

Zimistan ke ame welat
Vore zor kena
Pesew u peroz vorena
Rawu u welaxu cêna
Mal u ga kuno zere
Milet kuno zere
Dîna pêro sîs kena

Zimistan ke ame welat
Karê dewe beno senik
Milet yêno tê lewe
Movetê cîranu beno tenik

Zimistan ke ame welat
Adir beno we lozingede
Rojî benê serd
Sewî benê derg
Sanike vajîna domonu rê
Eke bena derge sewe
Sewe ra jêde bena derge a sanike

Zimistan ke ame welat
Vore xêlê manena rîyê hardî de
Binê vore de maneno her çî xorî de
Milet vano raviloşîyo endî na vore
Usar xêlê kuno sarî vîrî de

Vore viloşîna ro nat u dot de
Silîye vorena vore ser de
Mîjdanîya usarî yêna na het u o het de
Xojîvê sarî yêno hurendî na hêne de
Uwa vore rêzena pira pira êndî dere u çemu de

EZ U AP SILÊMANÊ QIJÎ

Serra di hazar u des zu de
Roza de demsera de payîjî
Ez u ap Silêmanê Qijî
Pîya şîme verê çemê Munzurî

Ma pîya çem de nîyada
Gegane nejdî
Gegane durî

Ververê Munzurî de
Game ve game
Tenê ke hênî fetelîyayîme
Tenê ra dime qefelîyayîme
Nîştîme ro
Verê çemê Munzurî de

Çimê ap silemanî uwa Munzurî ra mendî
Hênî miruzin
Hênî nêmezet

Mi zona ke
Tepîya ame ra Ap Silemanî vîrî
Dirvetîya hîris u heştî

Mi va Apo Silêman
Hîris u heşt de
Çi bîyo
Çi nêbîyo
Naye ser o
Xêlê qal amo ra
Xêlê qesey bîyo
Xêlê kitavu de nuşîyo
Xêlê şuwaru de eve vengê tora vajîyo

Hîris u heşt
Sera ma
Torva de girana
Kulo de xurîyo

Hata na roze
No kulo xorî
Ber bîyo
Rêz bîyo
Hema wes nêbîyo

Ez zonenu
Çîyo ke sima dîyo
Çîyo de senik nîyo

Unca kî
Wazenu tora pers bikerî

Serê na hardo dewreşî de
Gola na Dersîmî de
Na kowu de
Gerîsu de
Deru de
Derxulu de
Sima
Çi dî
Çi nedî
Wazena mirê xesey bikerê

Ap Silemanî
Qayîte çem î kerd tepîya
Vinet tenê bevengîye ra
Tenê ra dima
Cîgera mi vake
Se vajî
Çi qesey bikerî
Çi wele ve horokerî
Kafirû mara azê nêverda
Fermano de girs vet serva ma
Eskerî guret pêro dormê ma

Kam ke kewt ra dest
Sarê ma ra
Camordî u cênû ra
Qiz u pîlu ra
Gîrêdayî pêro juvinî ra
Ardî verê na çemî

Verê na çemî de
Ax cîgera mi

Verê na çemî de
Eve tifongu
Eve sungü
Eve axir makina
Qersunî vornay sarê mara

Verê na çemî de
Ax cîgera mi
Verê na çemî de
Qir kerd pêro sarê ma

Verê na çemî de
Ax cîgera mi
Verê na çemî de
Gonî şîye ma ra

Na çemê munzurî
Na uwa xizirî
Sodir u sondir
Pesewe u peroz
Sur kerd pêro gonîya ma ra

Ayê ke remayî
Ayê ke era dest nêkewtî
Ayê ke kewtî zerê maxaru
Ê kî qir kerdî eve gaz o zehîrên ra

Eve rozu
Eve sewu
Eve serru
Gonî şîye ma ra
Çîgera mi gonî şîye ma ra

Mi va
Apo silêman
Eskerî çutir hundê zor u zulum kerd
Çutir ame kewt welatê ma
Çira keşî hover nê da
Sarrê ma ra

Ap silemanî
Vake
Cîgera mi
Mordemê de xirtî bî sarrê ma ra
Bedele ju alayî ye bî her sevkane de ma
Tayê aşîru bêbextîye kerde
Kewtî ra ekserî ver
Ca salix da

Eke aşîrî nebîyêne
Hukumatî bese nêkerdêne
Eke mixanetîye nebîyêne
Hukumatî hunde zor nêkerdêne

Mi va apo silêman
O wext
Ti kotî bîya
Çond serrî de bîya
Kamejî hetî ser şîya
Ti na torva girane ra
Çutir wes xeleşîya

Ap silemanî
Vake
Eve kemane ra cîgera mi

Mi kemane cinit
Henî xeleşûne
Kemane ke nebîyêne
Ez nêxeleşîyêne

Kam ke kewtênê ra dest
Qir kerdêne
Kam ke kewtênê ra dest
Gop kerdêne
Destê yê kafiru ra kes nêxeleşîyêne

Mi kemane cinit
Hênî xeleşûne

Mi kemane cinit
Henî payra mendune

Mi kemane cinit
Henî zerê mirê dîyax ame

Mî şüyarî vatî
Henî hata na roze amune

Eke hên nêbîyêne
Ez çutir damîs bîyêne
Eke hên nêbîyêne
Ez çutir hata na roze amêne

Cîgera mi
Eke hên nêbîyêne
Mi na derdê giranî
Çutîr nîya poşt kerdêne

Ax cîgera mi
Eke hên nêbîyêne
Ez nêxeleşîyêne
Eke hên nêbîyêne
Ez rew şîyêne...

WEXTO VIRÊN DE MARÊ DEWE

Wexto virên de
Girs bîye marê dewe
Jê welatî
Jê dîna
Jê asmênî girs

Wexto virên de
Roşt bîye marê dewe
Roştîya rojî
Roştîya çimu
Roştîya weşîye

Wexto virên de
Zon bîye marê dewe
Zonê zonayîşî
Zonê huyayîşî
Zonê kirmancîye

Wexto virên de
Va bîye marê dewe
Vao paka
Vao hewra
Vao sipêla

Wexto virên de
Serd u germ bîye marê dewe
Rast u çewt bîye
Jê ho bîye
U jê ma bîye

Wexto virên de
Dewe
Marê çê bîye
Ware bîye
Vora koy bîye
Uwa zelale bîye

Wexto virên de
Dewe
Kamîya ma bîye
Kirmancîya ma bîye
Welatê ma bîye

ÊNDÎ BÊ

Têynîyarû

Bê to

Hewn nêkuno çimunê mî

Pesewe nêbena peroz

Sodir nêbeno sondir

Têynîyarû

Hurêndîya to xorîya

Têynîyayênî mirê dirvetîya

Şîyayena to mirê xençerîya

Nika na suke mirê îsiza

Têynîyarû

Tarîyo

Astarey çînê rîyê asmênî de

Asme çîna

Va vineto

Têynîyarû

Êndî bê delala mî

Endî bê

Bê to nêbeno

SURGINDE MENDÎ MEZELÊ HO

Qesêykerdêne înu
Ma gosdêne
Qermoçikin bî rîyo ho
Bêvengîye wanîyêne cira
Zonaxîye wanîyêne
Însonîye u hewlîye wanîyêne

Ê ke serê pirdu ra vêdêne ra
Roştîya çîmunê înu bîyêne eskera
Hêkatê vinetene yê rîyu de wanîyêne
Kokimenî u keder yê xetu de restêne pê

Qesêy kerdêne înu
Ma gos dêne

Honake ma uza bîme
Honake vîrane nêbîvî dewê ma
Honake ma jê ho bîme
Hona ke domonunê ma zonê ho qesey kerdêne

Pêyê yê kowu de
Pukeleka zimistanî de
Sewunê dergu de
Verê lozingede
Qesey kerdêne înu
Ma gos dêne

Ma dest estêne ra vîjerenî
Perşî pers kerdêne
Serva tarîxê ho
U serva kamîya ho perskerdêne

Çînebî tarîxê mawo nusaye
Nêverdavî binuşîyo
Coka ma nêwendêne
Qesey kerdêne înu
Ma gos dêne

Veng vetêne tarîxî
Vengo de xorî bî na veng
Beno ke qîrayîs bî
Ya kî jîvayîs bî

Qesey kerdêne înu
Ma gos dêne

Derg bî emrê înu
Hata neway sere se sere şîyêne
Emro derg zerê înu de sir bî

Bî eskera pêynîye de na sir
Tilsim bî xirave
Vengê înu birîya
Pêro oncîyayî uwê deru
Çem î xeneçîyayî
Pirdî rijîyayî

Veng birîya
Êndî ma gos nêdayî

Her merdene rew merdena vatîvî saîrî

Raste bîye

Her medene rew merdene bîye

Hema ye dîne jêde rew bîye

Hona şêst sere nêkewtî merdî pêro

Surgin de mendî mezelê ho

Qisaweta înu dêwunê vêsawude mende

Huyayîsê înu dêsunê rijawu ra mend

Teşîrê vengê înu zerê ma de mend

TI AMA

Demsera usarî bî wext
Ez ho fetelîyêne
Teynîyayenîya her sodirî de
Ez hem ho fetelîyêne
Hem kî bêvengîya hewnê ho de to

Qedîfe o de tejîya usarî bîye asma gulane
Ez çirtano de zelal fetelîyêne
Zerê çimunê tode

Rîyê tode
Roştîya asma bereqîyayîye fetelîyêne

Mi
Ti pers kerdêne her wext
Sefaqe sodirî ra

Ti merex kerdêne
Mi vatêne a kama
Nika kotî ya
Çutir huyena
Çutir nîyadana
Ho çutir neqesnena

Raya ke ti piro amêne şîyêne
Ez a raye sero vinetêne
Cadeyo ke ti vêrdênê ra
Tramvayo ke ti nîştêne ro ci
Vapura ke ti cira amêne ra war
Ez uza vinetêne
Bê veng

Nîyamêne hema ti yê rawu ra
Qe nîyamêne
Ya kî amêne
Mi ti nedîyêne

Dima ez
Hetê dengizî ser şîyêne
Vengê dengizî gos dêne mi
Dengizî qalê to kerdêne mide
Asmenî qalê to kerdêne
Mîlçik u têyru
Tirênu
Tramvayu
Sayêke tora xevere ardêne

Xevera tora raver
Ti ama
Xaftilêna
Bê veng
Bê xevere
Bê sevev

Ti ama

Porê tuyo zerd de gula de sure bîye

Rîyê to de huyayîso de tenik bî

Ti ama

Asma gulane de

Ti ama

Gina ro serê zerya mi

Ti ama

Bîya omidê mi

Ti ama

Kewta omrê mi

Ti ama

Reyna nêvejî ya

Zerya mi ra kî

Omrê mi ra kî

VÎRAKerdîs

Ko u dewê welatî
Roz u sewê welatî
Asmên u hardê welatî
Ma ho vîra kerdo

Rindekîya zonê ho
Bingê kultire ho
Homet u qomê ho
Vengê kilaşu u laukunê ho
Ma hovîra kerdo

Buwa gul u sosinu
Xuse xusa deru u çemu
Vengê toyru u mîlçiku
Ma hovîra kerdo

Hewjîya usarî
Germê amnanî
Çeqerê payîjî
Vora zimistanî
Pêro ma howîra kerdo

Sodir tîj zeledayene
Sondir adir verde qesêy kerdayene
Rîyê asmênî ra nîadayene
Pêro ma hovîra kerdo

Sukunê pîlu de
Welat ra dur mendaenede
Wertê vîndbîayenede
Ma her çîyê ho hovîra kerdo

MAYÊ SEMÎ

Her roza semîye
Meydanê Galatasaray de
Wextê ronîştina mawu de
Gegane beno usar
Gegane beno anman
Gegabe beno payîz
Gegane beno zimistan

Her roza semîye
Meydanê Galatasaray de
Wextê ronîştina mawu de
Gegane tîjî erzena
Gegane silîye vorena
Gegane vore vorena

Her roza semîye
Meydanê Galatasaray de
Wextê ronîştina mawu de
Gegane têyrî vêrenê ra
Gegane tiramvay
Gegane sar

Her roza semîye
Meydanê Galatasarayîye de
Wextê ronîştene mawu de
Her tim
Bêvengîya mawu axme bena
Eve rismunê domanune ho

O wext
Teynîya zu pers voreno
Zu pers vêreno ra
Zu pers axme beno
Zu pers beno berz

Henî bêveng
Henî bê guman
Henî bê ters
Henî bê xof
Henî çîp
Henî xurt
Henî derga derg
Zu pers

O pers zirçeno
O pers qîreno
O pers vano
Domanê ma kotîyê
Kotîderê domanê ma
Kotîyêêê....

O wext
Her çî vindeno hurendîya hode
Roz vindeno
Asme ke esta a vindena
Siliye vindena
Vore vindena
Serd vindeno
Germ vindeno
Teyrî vîndenê
Tramvay vindeno
Sar pêro vindeno

Her çî bêveng maneno
A bêvengîye ra
Persode girs vejîno

O vengo bê veng tepîya vano
Kotîyê domanê ma
Domanê ma kotîyê...

VAZE HELA

Be ronîse hela
Bê vase
Dîna çira hundê tip u tola
Cuyayîs çira tip u tolo
Teynîyayîye u keder
Huyayîs u qîrayîs
Bervayîs u jîvayîs
Çira hundê tip u tolo

Bê hela
Bê veng bide
Bê vengê ho berz ke
Bê vase
Dîna çira hundê hîra wa
Asme çira hunde zerda
Astorey çira hundê dur ra bereqînê

Vaze hela

Bê vase

Asmeno kewe çira bê pey o

Hardo dewres çira bê pey o

Derya dengiz çira bê pêy o

Vaze hela

Cuyayîs bê pey yo

Yake nîyo

Vaze hela

Vaze...

A HÊNE DE

A hêne de
Hevê mendî vî ke
Uza weşîye biqedîyo

A hêne de
Uza de
Vao de paka amêne hurdî hurdî

A hêne de
Ê vayê pakayî terso de girs ardêne
Ma sero axme kerdêne

A hêne ra dima
O terso girs bî eskera
Pira pira

A hênera dima
Kila adirî kewte wertê dewe
Dormê bonu guret
Heve ve heve

A hêne ra xêlê wext ra dima
Bîye jêde a kila adirî
Bîye hare
Bîye ra derge
Reste asmeno kewe

A hêne de
Çi kewtî vî bara ma
Ma nêzonêne
No çik bî
Senê vao de paka bî

No marê surgino de bîn bî
Ya kî çîyo de bîn bî
Ma gere kamêjî rayera bişîyêne
Kamêjî het marê jê de kederin bî

Çi ke kewt bara ma
Gere ma bara ho biguretêne

Ma bara ho gurete
Roza de vortîsê silîye de
Hawar u zirçayîs ra
Çîmunê hêştîrin u kederinu ra
Hetê verojî ra kewtîme ra raye

Dewê huyê vêsayeyî
Hemegê huyo hazar serru
Vengê mîlçiku u têyru
Ma pêyê hode ca verda
Bîme ra rast pêro pîya

Koy vênayî ra
Dewî vênayî ra
Dere yî u çem î vernayî ra

Ameyme dewunê bînu
Ma va
Na dewu de maneme belkîya
Nê dewî
Benê dewê ma

Bado ma nîyada ke
Halê yê dewu kî
Bîyo fênda dewunê ma
Yê dewî kî vêsenê
Zerê hode pira pira

Sarrê yê dewu kî rest ma
Kêwtîme ra raye têpîya
Sukunê qizu u pîl u ra vêrdîme ra
Keder u melulênîya ho ra
Amêyme sukunê pîlu
Sukunê vîndbîyawu
Dî naza ma
Surginode pîl tepîya

Welatê hora durî
Sukunê pîlu de
Surgin de
Bê çê
Bê ware
Bê kes mendîme

Koyê ma
Dere u çemê ma
Pesewe u peroz
Kewtî hewnê ma

Nê şî welatê ma
Sew u roz
Qe vîr ra ma ra

Vêsan mendîme
Têsan mendîme
Caye de parçeyê de nun
Nêkewt bara ma

Kar fetelîyayîme
Gurê fetelîyayîme
Kelepurê karkerênîde
Eve serru emegê ho
Bê pere rot ma

Surgino de pîl de mendîme
Eve serru
Welatê hora dur mendîme
Na surginiye xêlê şîye nîya

Xêlê wext ra dima
Qedîye na surginîya ma
Qedîye xerîvîya ma

Wertê xiravîye ra
Wertê bindestîye ra
Vêjayme
Pêyser amêyme welatê ho tepîya

Pêyser amêyme
Hetê kirmancîye ser
Hetê vîjêrênî ser
Hetê ho ser

Pêyser amêyme
Tepîya
Welatê ho dî ma
Çimê ma bî ra

Va verva ma bî ra
Koy bî hîra
Sovirê ma teng bî
Bî hîra

Pêyser ameyme
Roz vêjîya
Miz oncîya
Hord lerza
Sa bî derê yî u çem î
Jar u dîyarî sa bî
Pêro pîya

Pêyser amêyme
Nika welatê ho derîme
Nêmento hurêndî de toyê de ma
Vêsnê pêro çêyê ma
Zerê dewe de
Wertê sewe de
Tevera mendîme

Pêyser amêyme
Çêwunê ho virazeme pêro pîya
Rawu keme ra pira pira
Keme şên welatê ho tepîya

Pêyser amêyme
Nika dewunê hoderîme
Çewunê ho derîme
Weşîye jê virênî nîya hema
Xojîvê mawo ke
Tepîya welatê ho derîme

TI YÊNA RA MI VÎRÎ

Çond serrîyo ke
Zerê hepisxaneyî de
Hücraya de ting u tarîye de
Têynîyayîya bêtere de
Ez ke nîsenune ro
Ranza huya demirêne de
Ti yêna ra mi vîrî
Ti
Delala mina pore zerde

Çond serrîyo ke
Zerê hepisxaneyî de
Hûcra ya de caxeyîne de
Dîna ke bîye bêvenge
Zerya mi ke bîye tenge
Ti yênara mi vîrî
Ti
Delala mina cime zenge

Çond serrîyo ke
Zerê hepisxaneyî de
Hûcra ya de barîye de
Nêmesewe de
Bekeşîya pesewe de
Omidê nimo meste de
Ti yênara mi vîrî
Ti
Delala mina bejna derge

NEWROZ

Ewro newrozo
Roz bîyo berz
Vore şîya
Hardo şa vejîyo
Wele bîya germ
Vaso kewe vejîyo

Ewro newrozo
Roza newîya
Hotemalê marte ya
Marta vîşt u zu ya
Roza sarê ma u sarunê bindetuna

Ewro newrozo
Newroz marê mîjdanîya usarî yo
Bayremê azadî yo
Verva bindestî yo

Ewro newrozo
Kes nêmando çêwu de
Bîyo kom pêro sarê ma pîl u qiz ra
Wertê dewu u suku de

Ewro newrozo
Adir kerdo we sarê ma
Serva roza ho
Adir girs u berzo
Govende gureta qizu u pîlu
Govende derga

Ewro newrozo
Newroz
Sarê kirmanc u sarrun dînarê
Fîraz u bimbarek bo

RENGO KEWE

Rengo kewe
Rengo de xaso sêrva mi
Na reng de ez ho vênenu
Huyayîsê ho
Bervayîsê ho
U teselîya ho vênenu

Rengo kewe
Rayade derga sêrva mi
Raya de bê pey ya
Jê kewê asmenî ya
Sonu nêsonu nêqêdîna

Gegane wazenu ke şerî kewê asmenî reşî
Şerî o kewe de vîndî bî
Uza de
O kewede teynîya bimanî
A teynîyayîye de
Tenê berî ra ho

Hema nîyadanu ke
Kewê asmenî durîyo mira
Ez nêşîkînu şerî ci reşî
Coka ke çarnenu kewo de bîn çîmunê ho
Kewo de nejdî

Hetê derya ser sonu eve vostene
Hetê dengizî ser
U xaftilêna vîndenu
Nejdîye na kewo nejdî de

Verî coyî hewayê ey oncenu zerê ho
Dima vengê ey qelevîno vengê mi
Ez tenêna yênu ra ho
Eke qayîte na kewo nejdî kenu
Dima benu vîndî sonu
O kewo nêjdî de

HETÊRA

Hetê ra rindîye esta zerê mi de
Hetê ra ez qefêlûne

Haştîye esta hetê ra
Hetê ra marê çira hundê zulim

Hetê ra omido de xurt esto zerê mide
Hetêra selega de girane poştîya ma ra

Hetê ra roştîya rozunê verva ma
Hetê ra qirkerdena sarrê ma

Hetê de mi de quya de xorî ya
Hetê de mi de hewjî ya usarî ya

Hetê de mi tariyo zerê mi de
Heto bîn de her waxt erzena tîja sodirî

TI NÊNA

Bêvengîya sewunê dergu
To ana ra mi vîrî
Her wext

Gul u sosinê kowunê erjîyawu
Rîyê to anê ra mi vîrî
Her wext

Bereqîyayena asma sure
Porê to ana ra mi vîrî
Her wext

Fîtika vayê sodirî
Vengê to anara mi vîrî
Her wext

Destê minê ke ginê ro destunê to
Çimê minê ke gînê ro çimunê to
Qalê to kenê mide
Her wext

Xevera to ana mirê
Tozika vayê hewrayî
Her wext

Yêna vana
Bêguman yêna
Eve vengê huyo bêveng ra
Yêna vana

Tîjî eve huyayîs ho erzena pêyê koyî
Astareyî caye ho vurnenê sope ve sope

Her çî
Yêno sono
Bê veng
Bê sevev

Saatî
Deqîqeyî
Yênê u sonê
Tê dima u tê pêy

Hora
Zu ti nêna
Tîya ke kewta zerê xerîvîya mi
Hora zu ti nêna

ZELZELE

Ax de wayî... wayî...
Adiro de bê ware zerê ma de
Dezo de giran zerya ma de
Kila çîke çewunê u çêverunê ma de
Ne adir saynîno
Ne kile darîna we

Ax de wayî... wayî...
Wextê zerzeleyî ame tepîya
Hard zinga derga derg eve lerze ra
Her ca kerd têser u tê bin ra
Ne ca belî beno
Ne kî cadeyî

Ax de wayî... wayî...
Helmo ke made bî şîma ra
Loqmê nunî nêsono gula mara
Tosê ke uwe burîme
Sermayeme ho ve hora

Ax de wayî... wayî...
Kila adirîya henêna ke zerê ma de
Silîye vorena nêsaynîna
Vore vorena nêsaynîna



ROZÊ RINDEKÎ

Bülent Boral, 1972 de Çewlîg (Bîngöl)
de dewa Xorxolî Hêrdîf de ame dîna.
Domonênîya ho dewe de vêrde ra.
1985 de eve çê ho barkerd şî Estemol.
2011 de Sairê Dersîmî Silêmanê Qîjî
sero ju belgefilm ont. Belgefilm de
bîn kî 'Mordemo ke Kemerude Qeseyî
Keno' serra 2022 de suka Van î de ont.
Nîka hetê belgefilm sero gurênayisê ho
devam keno.

*Ma henî zona ke
Ê rozê rindekî rew yê nê hetê ma ser de
Xoza rêw bena hewze dormê ma de
Was koka ho ser ro rew royeno
Dar u ber rew jîl dano
Perperik î rew fir danê nat u dot de
Goze rew bena kakile dara ho de
Meş î pêtaga ho ra rew vejî nê
Rew fetelî nê gul u çiçegu ser ra*



babek

